

四庫全書

子部

欽定四庫全書

格致鏡原卷八十二

大學士陳元龍撰

獸類一

總

本草綱目獸產於山故毛似草 淮南子毛犢生應龍
應龍生建馬建馬生麒麟麒麟生庶獸凡毛者生於庶
獸 物原軒轅始醫獸少皞始閭潔六畜 揚雄方言
物無偶曰特獸無偶曰介 邢昺爾雅疏獸者守也言

其力多不易可擒先須圍守然後乃獲故曰獸也通而爲說鳥不可曰獸獸亦可曰禽故曲禮鸚鵡不曰獸而猩猩通曰禽也易曰王用三驅失前禽則驅走者亦曰禽也 潛確類書益稷百獸率舞非專以走獸爲言考工記曰天下大獸五脂者膏者羸者羽者鱗者是禽亦可以名獸華佗語吳普曰吾有一術名五禽之戲一曰虎二曰鹿三曰熊四曰猿五曰鳥是獸亦可以名禽宋書比肩獸王者德及矜寡則至一角獸天下平一則

至三角獸先王法度脩則至六足獸王者謀及衆庶則
至孫卿子獸窮則攬輟耕錄凡走獸及牛馬諸畜
肝膽之間有肉囊累累多至升許大者如雞子曰鮓答
留青日札走獸腹中所產石子名鮓答蒙古人用以
禱雨一作鮓單出西寧古輪臺之地又曰馬驢鼻患腫
毒即難秣土人伺其將潰以囊承口腫落而得之軍中
無水即掘地置其中以氈覆之可得水一二升

麒麟

大戴禮毛蟲三百六十而麒麟爲之長 論衡講瑞麒

麟獸之聖者也 春秋保乾圖歲星散爲麟 孔演圖

麟木精也宋均注麟木精生水故曰陰木氣好土土黃

木青故麟色青黃 春秋運斗樞機星得則麒麟生萬

人壽 鵠冠子麟者玄枵之獸陰之精也德能致之其

精畢至 孫卿子古之王者其政好生惡殺麟在郊野

月令章句凡麟生於火遊於土故脩其母致其子五

行之精也 瑞應圖麟王者嘉祥也食嘉禾之實飲珠

王之英 春秋感精符麟一角明海內共一主也王者
不割胎不剖卵則出於郊 京房麟有五采腹黃高丈
二金獸之瑞 陸璣詩疏麟麇身牛尾馬足黃色圓蹄
一角角端有肉音中鐘呂行中規矩遊必擇地詳而後
處不履生蟲不踐生草不羣居不侶行不入陷阱不罹
羅網王者至仁則出 廣雅麇狼蹄肉角 埤雅麇
土畜也信而應禮以足至者也軒轅大角之獸狼額赤
目五蹄 宋書符瑞志麒麟牡曰麒牝曰麟狼項而一

角含仁而戴義或云麟有角麒麟似麟而無角 瑞應圖
麟之青曰聳孤赤曰炎駒白曰索冥黑曰角端黃曰麒
麇 何法盛徵祥記麟牡鳴曰遊聖牝鳴曰歸和夏鳴
曰扶幼秋鳴曰養綏 抱朴子麟壽三千歲 廣雅麟
壽一千歲 淮南子麒麟鬪則日月蝕注麒麟一角之
獸故與日相符 庶物異名疏般般麟也封禪書般般
之獸樂我君圓白質青章其儀可嘉薛道衡曰般般擾
義 尚書中候黃帝時麒麟在囿 拾遺記孔子生之

先有麟吐玉書於闕里人家云水精之子系衰周而素
王母徵在以繡紱繫其角及夫子將終抱麟解紱而泣
漢書終軍從上幸雍獲白麟一角五蹄 東觀漢記
章帝時麟五十一見安帝三年潁川上言麟見 王隱
晉書咸寧五年白麒麟見平原泰始元年白麟見羣獸
皆從 孔六帖前蜀王建武成元年十月麟見壁州永
平二年六月麟見文州三年麟見永泰四年麟見昌州
路史鉏商一獲而周室衰孝武一獲而漢祚微章帝

何人而元和二三年間郡國上麟者五十一安帝延光
亦且三見孝獻延康之元一年之間至十獻於郡國石
季龍開華林郡國上送蒼麟二八爰俾司虞調之以駕
芝蓋晉宋以降無代無有而孟蜀之邦乃至多於犬羆
不知果何物耶 五雜組永樂中曾獲麟命工圖畫傳
賜大臣余嘗於一故家得見之其身全似鹿但頸甚長
可三四尺耳所謂麋身牛尾馬蹄者近之與今俗所畫
迥不類 列仙傳王方平常乘一黃麟降蔡經家擘脯

而食云是麟脯 爾雅疏并州界有麟大小如鹿非瑞
麟也故司馬相如賦曰射麋脚麟謂此麟也 物類相
感志蛭麟出罽賓國似海獸紫色有鱗甲頂有穴光出
圓珠能入水與龍鬪吼聲如雷 三輔黃圖青梧觀在
五柞宮之西梧桐樹下有石麒麟二枚刊其脇文字是
秦始皇驪山墓上物也頭高一丈三尺東邊者前左脚
折處有赤如血父老謂其有神皆含血屬筋焉

獬豸

輿服志獬廌

同獬豸

神羊也

廣博物志獬廌廣韻作獬豸

神異經東北荒中有獸如羊一角毛青四足似熊性

忠直見人鬪則觸不直聞人論則咋不正名曰獬豸一

名任法獸故立獄皆東北依所在也說文獬豸似山

牛一角神人以廌遺黃帝帝曰何食何處曰食薦春夏

處水澤秋冬處松栢風俗通獬廌食楝田俅子堯

時有獬廌緝其毛爲帝帳論衡魃魃者一角之羊也

性知有罪臯陶冶獄其罪疑者令羊觸之有罪則觸無

罪則不觸斯蓋天生一角聖獸助獄爲驗故臯陶敬羊
起坐事之 酉陽雜俎玄宗時富平縣產一角神羊肉
角當頂白毛上捧議者以爲獬豸

獅

東觀漢記獅子形如虎正黃有髯形尾端茸毛大如斗
銅頭鐵額鉤爪鋸牙彌耳跪足目光如電聲吼如雷能
食虎豹外國之產毛羣之長也 東晉發蒙記獅子五
色而食虎於巨山之岫一噬則百人俯惟畏鉤戟 劉

郁西使記獅子雄者鬃尾如纓拂傷人吼則聲從腹中
出埤雅獅子虎見之而伏豹見之而瞑羆見之而躍
爾雅狡麋如競貓食虎豹註卽獅子也出西域 穆
天子傳狡狴日走五百里 說文羆獅子也 山堂肆
考太乙真人受玉清勅命乘青獅往獄中度濟人罪

司馬彪續漢書章和元年安息國獻獅子形如麟無角
南史梁武帝時波斯獻生獅子帝問曰獅子有何色
劉顯曰黃獅子超不及白獅子超 伽藍記元魏波斯

國獻獅子永安末始達京師莊帝謂侍中李或曰朕聞
虎見獅子必伏可覓試之於是詔近山郡縣捕虎以進
鞏縣山陽并進二虎一豹見獅子悉瞑目不敢仰視園
中素有一盲熊性甚馴善帝令取試之虞人牽盲熊至
聞獅子氣驚怖跳踉曳鎖而起帝大笑 宋炳擊象圖
序沙門釋僧吉嘗從天竺欲向大嶺忽聞數十里外哮
哮檻檻驚天怖地頃之但見百獸率走伏地欲絕而四
巨象虓焉而至以鼻卷泥自厚塗數尺數數噴鼻隅立

俄有獅子三頭見於山下直搏四象崩血若濫泉巨樹
草偃 癸辛雜志元時有貢獅子者首類虎身如狗青
黑色宮中以爲不類所畫者疑非真使牽入虎牢皆俯
首帖耳不敢動獅子遂溺於虎之首虎亦莫敢動也乃
知爲真獅子 輟耕錄元朝大會羣臣盡出諸獸於萬
歲山若虎豹熊象之屬一一置列訖然後獅子至身材
短小絕類人家所畜金毛獠狗諸獸見之畏懼俯伏不
敢仰視及各飼以雞鴨野味之類諸獸不免以爪按定

用舌去其毛羽惟獅子則以掌擊而吹之毛羽紛然脫落此其所以異於諸獸也 珍珠船獅子房獅子二號日食活羊一隻半白糖四兩羊乳二瓶醋二瓶花椒一两三錢 安樂集取牛羊驢馬諸乳置一器中若將獅子乳一滴投之一切諸乳悉化爲水 偃曝談餘獅子乳以金銀寶器盛之皆漏惟玻璃則否 酉陽雜俎集賢校理張希復言舊有獅子尾拂夏月蠅蚋不敢集其上 酉陽雜俎釋氏書言獅子筋爲絃鼓之衆絃皆絕

西域有黑獅子棒獅子舊說蘇合香獅子糞也 博物志魏武伐冒頓經白狼山逢師子使格之見一物從林中出如狸止帝車軌上師子將至便跳上師子頭師子伏不敢起遂殺之得師子還至四十里鷄犬皆無鳴吠治世餘聞錄西番貢獅子其性勁險一番長與之相守少離則威作畜二小獸名曰吼形類兔兩耳尖長僅尺獅作威時卽牽吼視之獅畏伏不動蓋吼作溺著其體肉卽腐爛吼獨獠又畏雄鴻鴻引吭高鳴吼亦畏伏

物類相制如此 春宴錄貴家遊賞曲江剪百花裝成
獅子相送遺獅子有小連環欲送以蜀錦流蘇牽之曰
春光且莫去留與醉人看

虎

總論 運斗樞樞星散而爲虎 風俗通虎者陽物百
獸之長 說文虎山獸之君 春秋考異郵三九二十
七者陽氣成故虎七月而生陽立於七故虎首尾長七
尺般文者陰陽雜也 周易風從虎 本草衍義風之

從虎者蓋風木也虎金也木受金制安得不從故嘯則
風生自然之理也 管輅別傳虎者陰精而居於陽依
木長嘯動於巽二氣相感故能運風 禮月令仲冬虎
始交 酉陽雜俎虎交而月暈 格物論虎一生止一
乳一乳必雙所謂虎不再交是也死必靠木及巖石未
嘗仆地一名大蟲 淮南子虎有子不能搏攫者殺之
爲其墮武也 尸子虎豹未成文而有食牛之氣 格
物總論虎狀如猫而大如黃牛黑章鉤爪鋸牙舌大於

掌生倒刺鬚硬尖而光兩脅間及尾端皆有骨如乙字
長一二寸許者卽其威也破肉取之可得能令人有威
帶之臨官佳若無官者帶之必爲人所憎橫行而妥尾
其怒而吼也聲如雷百獸爲之震恐而風從之生矣

癸辛雜志虎骨甚異雖咫尺淺草能藏身不露及咆哮
作聲則巍然而大矣 劉氏鴻書虎性至猛烈雖遭逐
猶復徘徊顧步其傷重者輒咆哮作聲而去聽其聲之
多少知去之遠近率鳴一聲者爲一里其搏物不過三

躍不中則捨之 廣博物志虎行以爪坼地卜食觀奇
偶而行今人畫地卜者曰虎卜 癸辛雜志虎不行曲
路遇之者引至曲路即可避去 抱朴子虎壽千歲五
百歲毛色變白 運斗樞四方煩擾小民失恩虎銜魚

潛確類書虎黃者竊人羊豕多方窺伺得之黑虎所
見無不取白虎不甚搏殺坐食而已蓋黃是其幼弱者
黑適壯白卽老矣或曰白虎性仁其實老矣 彙苑詳
註虎搏獐兔先於四圍遺溺聞其氣不敢出生受其搏

癸辛雜志虎食犬則醉犬乃虎之酒也 留青日札

虎食楊梅而醉 陳繼儒虎薈虎食人後亦復肉醉土

人伺其醉殺之 彙苑虎啖人如猫食鼠初一至十五

食上身十六至月終食下身 癸辛雜志虎不食小兒

兒癡不知虎之可懼故不得而食又不食醉人必坐守

以俟其醒非俟其醒俟其懼也凡食男子必自勢起婦

人必自乳起惟不食婦人之陰 山堂肆考人或懼虎

口其神魂被虎所役往往爲之前導俗謂之俵鬼 聽

雨紀談人遇虎衣帶自解皆別置於地虎見人裸而後食之皆俛所爲俛可謂鬼之愚者也 廣異記俛鬼好酸可以烏白等梅及楊梅布之要路俛若食之便不見物虎乃可獲 七脩類藁虎俛凡虎之出入則引導以避其兇故獵者捕虎先設湯飯衣鞋於前以爲使之少滯則虎不知以落機穽 廣異記開元末渝州多虎暴設機穽恒未得之月夕人有登樹候望見一俛鬼如七八歲小兒無衣輕行通身碧色來發其機及過人又下

樹止之須臾一虎徑來爲陷機所中而死久之小兒行
哭而返因入虎口及明開視有碧石大如雞子在虎喉
焉 國史補俗言四指者天虎也五指者人虎也 王
穉登虎苑虎中有真虎真虎不可射其見射於裴旻者
非真虎也 五雜組射虎逆毛則入順毛則不入 埤
雅虎食青泥而解箭藥 五雜組山民防虎者有崖口
缺虎常躍入迺以巨絙縱橫而空懸之虎躍而下浮胃
絙上四足插空不能作勢終不能脫矣又有以藕布地

及橫施道側者虎頭觸之覺其黏也爪之不得下則坐
地上俄而遍體皆污怒號跳撲至死 異苑扶南王范
尋嘗蓄生虎人有訟未知曲直輒投虎虎不噬則爲直
於是蠻貊之人祀虎爲神 瀛涯勝覽榜葛刺國以鐵
索繫虎行市及人家則解索坐虎於庭裸而搏虎虎怒
交撲仆虎數回乃已或手投入虎喉虎亦不傷之戲已
仍繫之家必啖虎以肉勞其人以錢蓋虎戲以需財也
陳繼儒筆記巴丘南百折山中有道士善檻虎兩函

析之以鐵中不通也左關羊而開右以入虎懸機下焉
餓之抽其析出其爪牙揆而鋸之絀其舌已重餓之飼
以十銖之肉而已久則羸然弭然始飼以飯一杯菜一
盂未嘗不食也亦不復有一銖之肉矣以至童子皆得
飼之已而出諸囚都無雄心道士時與撲跌爲戲因而
賣與人守門以爲常率虎千錢大者千五百錢初猶驚
動馬牛後反見犬牛而驚矣或時伸腰振首輒受呵叱
置庭中以娛賓道士診其口爪鐫剔擾洗各有期道士

死其業廢 虎苑占城人能馴虎開圈弄虎手探口中
略無所損戲其足輒退縮言虎惜爪距故也又呼其名
即長吼 酉陽雜俎夜格虎時必見三虎並來挾者虎
威當刺其中者虎死威乃入地得之可却百邪虎初死
時記其頭所藉處候月黑夜掘之欲掘時必有虎來吼
擲前後不足畏此虎之鬼也深二尺當得物如琥珀蓋
虎目光淪入地所爲也 七脩類藁虎威在頸下二肘
間如乙字三寸許虎鏡在當心皮裏膜外若脆骨然取

而佩之臨官而能威衆常人則無憎疾者虎帶在胸而
通前左右二足乃大觔也可爲帶底故名前頸骨三稜
後頸骨圓直色皆桃紅而不空虛有微眼以唾濕其一
頭吹之少有沫焉其腸爲馬繯雖劣者可御 河圖懸
虎鼻門上宜官子孫帶印綬懸虎鼻門中周歲取作屑
與婦飲之生貴子勿令人知知即不驗亦不令婦見之
酉陽雜俎虎夜視一目放光一目看物獵人候而射
之光墜入地成白石主小兒驚 述異記漢中有虎生

角道家云虎千歲則牙蛻而角生 墨客揮犀虎每食
一人則耳成一缺汀州西山有虎爲暴十餘年後爲射
者所殺兩耳如鋸焉 酉陽雜俎仙人鄭思遠常騎虎
故人許隱病齒求治鄭曰惟得虎鬚及熱插齒間當愈
即拔數莖與之因知虎鬚治齒也 北戶錄按古方刮
虎牙治犬咬瘡神效無比 圖經虎骨并睛爪本經不
載所出州土今有山林處皆有之骨用頭及脰色黃者
佳睛亦多僞須自獲乃真 雷公炮製虎睛凡使須知

採人問其源有雌有雄有老有嫩有殺得者唯有中毒
自死者勿使却有傷人之患夫用虎睛先於生羊血中
浸一宿漉出微火上焙之乾搗成粉候衆藥出取合用
之風俗通虎能噬食鬼魅人卒得病燒虎皮飲之繫
之衣服亦辟惡左傳注臯比虎皮也尚書故實南
中久旱即以長繩繫虎頭骨投有龍處入水即數人牽
制不定俄頃雲起潭中雨亦隨降龍虎敵也雖枯骨猶
激動如此侯鯖錄虎變爲人惟尾不化須爲焚除乃

得成人 易林虎飢欲食見蝟而伏 酉陽雜俎蝟見
虎則跳入虎耳 龐元英談藪問山中有虎乎曰無有
何以無曰山中皆大林虎安敢來曰林木森森虎所隱
蔽何爲不來曰大木上多趨鼠虎過其下鼠必鳴噪自
拔其毛投虎身著處必生蟲則遍身瘡爛以至乎死故
畏不敢至方悟宣城包氏畫虎皆平原曠野茅葦叢薄
中亦有棘枝尋丈未嘗作林木者以此隋文帝云譬之
猛虎人不能害反爲毛間蟲所蠹損又可證也 廣博

物志駁食虎青腰食虎皆以小制大也 劉氏鴻書猾
無骨入虎口虎不能噬處虎腹中自內嚙之今云蠻夷
猾夏取此義 柳州集鹿畏羆羆畏虎虎畏羆 天中
記周書云夾林酋耳酋耳若虎尾叅於身食虎豹大傳
謂之侄獸 瑞應圖酋耳似虎而大見虎豹即殺之太
平則至 朝野僉載周永昌中涪中多虎暴有一獸似
虎而絕大逐一虎噬殺之錄奏檢瑞應圖乃酋耳也不
食生物有虎則殺之

名類 瑞應圖白虎者仁而不害王者不暴虐恩及行
輦則見 孝經援神契德至鳥獸白虎見 中興徵祥
說白虎狀如虎而白色嘯則風興皞身如雲而無雜者
是也近代所謂白虎者背斑而虎文爾雅所謂彪虎者
也 春秋孔演圖天命湯白虎戲朝其終白虎在野

符瑞志宋元嘉二十五年白虎見蜀郡二赤虎導前二
十六年白虎見南琅邪半陽山二虎隨從 詩疏騶虞
即白虎也黑文尾長於軀不食生物不履生草君王有

德則見應德而至者也 山海經林氏國有珍獸大若

虎五彩畢具尾長於身名曰騶吾乘之日行千里 爾

雅虎竊毛謂之競貓註竊淺也詩曰有貓有虎 爾雅

紺白虎註漢宣帝時南郡獲白虎獻其皮骨爪牙 爾

雅黼黑虎註晉永嘉四年建平秭歸縣檻得之狀如小

虎而黑毛深者爲斑山海經云幽都山多玄虎玄豹也

爾雅邢昺疏熊虎之類其子名狗絕有力名麋郭云

律曰捕虎一購錢三千其狗半之引之以證虎子名狗

之義也 格物總論彪特似虎而非真虎 說文委虎

虎有角者能行水中 彙苑詳註蒲喇加國山中出星

虎形如中國之虎略大其毛異其色赤有暗色花紋黃

斑 劉氏鴻書啞魯國山林中出一等飛虎如貓之大

遍身毛灰色有肉翅如蝙蝠翅前足肉翅生連後足能

飛不遠人或有捕得者不服家食即死

別名 金樓子寅日山中稱虞吏者虎也 說文虎西

方獸曰獸君以其爲山獸之君也亦曰山君 真誥寅

獸白齒亦能見機一云寅客 方言虎陳魏宋楚之間

或謂之李父江淮南楚之間謂之李耳或謂之於𪔐

於音

烏今江南山夷呼虎爲𪔐

自關東西或謂之伯都

風俗通呼虎爲

李耳卽喜呼班便怒 方言注江淮南楚之間謂之李

耳者虎食物值耳卽止以觸其諱故也 庶物異名疏

於擇虎也漢書序傳楚人謂虎爲於擇說文蒐作𪔐亦

作擇 虎苑義興山中虎名邐迹乃白額虎也周處射

殺之 清異錄石虎時避諱號虎爲黃猛 周書後周

楊忠從太祖狩於龍門獨當一虎左挾其腰右拔其舌
太祖壯之北臺謂虎爲擒于因以字之 廣異記天寶
中巴人伐太白廟前大松有老人以神樹止之巴人不
聽老人乃登山呼斑子俄羣虎出噬巴人又嶺南山魈
亦呼虎爲斑子 虎苑大中間寧茵秀才假大僚莊於
南山下月夜有斑寅將軍來謁氣貌雄武自陳斑氏出
於鬪穀於菟及明視門外惟虎蹤而已 虎薈湖南觀
察使裴休謁華林覺禪師休問師有侍者否曰有一兩

箇乃喚大空小空時二虎自菴後而出 天中記聰道人宋時結廬於雲間佘山之東峰有二虎爲之衛名大青小青行則隨侍前後 玉谿編事南詔謂虎爲波羅天中記雲南蠻人呼虎爲羅羅老則化爲虎有羅藏山 事物原始白額將軍嘯風子皆虎之別名胡人謂之巴而思

虎異 孟熙霏雪錄嘗見人云海虎頭白皮料影三種鯊魚皆能變虎 搜神記江漢之域有羆人其先稟

君之苗裔也能化爲虎或云羆虎化爲人好著紫葛衣
其足無踵虎有五指者皆是羆 獨異志漢景帝好遊
獵見虎不能得之乃爲珍饌祭所見之虎帝乃夢虎曰
汝祭我欲得我牙皮耶我自殺從汝取之明日帝入山
果見此虎死在祭所乃命剝取皮牙餘肉復爲虎 會
稽典錄葛仙翁憑白桐几學道數年白日登仙几化爲
白虎三脚兩頭往往人見之 晉書武帝太康六年南
陽獻兩足虎此毛蟲之孽 拾遺記始皇二年有畫工

名烈裔刻兩白玉虎其毛如生不點兩目睛始皇使餘
工夜往點之及旦虎飛去明年南郡獻白虎二隻視之
乃玉虎也命去目睛乃不能復去

豹

附貌
貌

易革卦君子豹變其文蔚也 埤雅豹花如錢黑而小

於虎 正字通豹狀似虎而小白面毛赤黃文黑而錢

圈中五圈左右各四者曰金錢豹宜爲裘西域有金線

豹文如金線 戒菴漫筆豹似小而文散者名艾葉豹

其價尤貴於連錢 山海經太山多赤豹詩云赤豹黃
羆 詩疏毛赤而文黑謂之赤豹毛白而文黑謂之白
豹 格物總論土豹其形小毛更無紋色亦不赤又一
種玄豹猛健皆不減於虎 列女傳陶大夫妻曰聞南
山有玄豹霧雨七日不下食欲以澤其毛衣而成其文
章 瑞應圖幽都即谷山上多玄豹 瑞應圖文王拘
於羑里散宜生得玄豹以獻紂免西伯之難 汲冢周
書屠州有黑豹 洞冥記元封中起神明之臺炮青豹

之脯青豹出浪坂之山狀如虎色如翠殺之爲脯食之
不愚 物類相感志如得丹豹髓磨錫爲屑以蘇合油
和之燭燈雖暴風驟雨而火光不滅也 韓子象箸玉
杯必不羹菽藿則必旄象豹胎 應劭漢官儀天子鹵
簿中後屬車施豹尾 五代史王彥章曰人死畱名豹
死畱皮 黃省曾獸經注豹一名程烈子曰程生馬古
詩云餓狼食不足餓豹食有餘言狼貪豹廉有所程度
而食 廣志豹死首山不忘本也 羅山記羅山高入

雲霧諸仙所遊上有豹獸文彩蔚然小似猿猴南海人名之爲果下豹非凡豹也華夷鳥獸考海豹出寧海其大如豹文身五色叢居水涯常以一豹護守如鴈奴之類其皮可飾鞍褥

豹 說文豹屬 彙苑詳註豹貅猛獸今人號雄兵曰豹貅 詩疏豹似虎或曰似熊一名執夷一名白狐其子爲穀遼東人謂之白羆

獬 爾雅獬白豹註似熊小頭庫脚黑白駁能舐食銅

鐵及竹骨骨節強直中實少髓皮辟濕或曰豹白色者
別名貉 埤雅貉獸象鼻犀目獅首豺髮其皮辟溫濕
以爲坐毯則消膜外之氣貉一作貉 說文貉似熊黃
色出蜀 神異經南方有獸毛黑如漆食鐵飲水名齧
鐵 廣志貉色蒼白其皮溫煖 南中八郡志貉大如
驢狀似熊多力所觸物無不拉 蜀都賦注建寧郡有
獸名貉黑毛白臆似熊而小以舌舐鐵須臾便數十斤
戒菴漫筆貉皮色似鹿當頸有白毛儼如瓦形取以

爲褥臥之可醒酒 物類相感志獮溺能消鐵爲水昔
閔氏悞吞針入腹刺血盈盤以獮溺服之其針消矣其
屎作刀可切玉石 白居易獮屏贊序獮生南方山谷
中寢其皮辟溫圖其形辟邪 圖經本草黔蜀中有獮
土人山居釜多爲所食其齒骨極堅以刀釜椎鍛鐵
皆碎落火亦不能燒人得之詐作佛牙佛骨以誑俚俗

犀

爾雅犀似豕註形似水牛豬頭大腹庫脚脚有三蹄黑

色三角一在頂上一在額上一在鼻上鼻上者即食角也小而不橢好食棘亦有一角者 嶺表錄異犀有二角一在額上爲兕犀一在鼻上爲胡帽犀牯犀亦有二角皆爲毛犀而今人多傳一角之說 交州記犀鼻上角長額上角短或曰三角者水犀也二角者山犀也在頂上者謂之頂犀在鼻者謂之鼻犀 異物志犀體兼五種肉舌有棘常食草木棘刺不食棘葉也 林邑國記犀行過叢林不通便開口露齒前向直指棘林自開

交州記犀出几德縣其毛如豕蹄有三甲頭如馬

埤雅犀性絕躁似豕一管三毛有鴝處必有之 格物
總論鴝飲水處有犀牛若不自濯其角必爲水物食之
而死蓋鴝食蛇毒在焉故也 鳥獸續考犀拋糞如染

坊蘆黃色

格物總論海人取犀之法先於山路多植

木如豬羊棧其犀以前脚直常依木而息多年植木爛

犀或倚之即木折犀倒久不能起因格殺而取其角

周官函人爲甲犀甲七屬兕甲六屬注犀革差劣於兕

故兕甲六屬減一犀甲七屬增一也 酉陽雜俎犀牛

一名奴角 翻譯名義集劫伽此云犀牛 洞冥記武

帝時吠勒國貢文犀四頭狀如水犀角表有光因名明

犀 東觀漢記章帝元和二年日南獻白雉白犀 南

越志海中出離水犀似牛其出入有光水爲之開 異

物志海中水犀樂聞絲竹人動樂則犀出以此採之

述異記却塵犀海獸也其角辟塵致之於座塵埃不入

梁祚魏國統西南夷土有異犀三角夜行如大炬火

照數千步 瀛涯勝覽占城國犀角象牙甚多犀如水
牛大者八百斤體無毛黑色鱗甲皮厚蹄有三跖獨角
在鼻端長者可尺五寸唯啖刺樹葉條乾木 海語海
犀間出海上類野兕而額鼻有角與陸犀同所遊止處
水爲分裂夜則淵面白光熒熒此其異也島夷以是候
之然竟無獲者遂爲希世之物矣舊說溫嶠燃犀照水
神怪莫遯即其角也又野犀有名通天者角表夜光如
炬亦奇物也

兕

本草陳藏器云兕是犀之雌者而形不同 說文兕如
野牛青色皮堅厚可以爲鎧 山經圖贊兕惟壯獸似
牛青黑力無不傾自焚以革皮充武備角助文德 交
州記兕出九真有一角角長三尺餘形如馬鞭柄 蟬
史兕背似馬鞍善觸有水兕有山兕猶犀有二種也

呂覽殺隨兕者不出三月

謂隨母之兕

論衡太師尚父爲

周司馬將師伐紂到孟津之上杖鉞把旄號其衆曰蒼

兕蒼兕夫蒼兕水中之獸也善覆人船因神以化令汝
急渡不急渡蒼兕害汝河中有此異物時出浮揚一身
九頭人惡畏之未必能覆舟也唐六典禮部白兕爲
上瑞

象

總論 春秋運斗樞瑤光星散而爲象 說文象長鼻
牙南越之大獸三歲一乳 南州異物志象之爲獸形
體特詭身倍數牛目不逾豕鼻爲口役望頭若尾馴良

承教聽言則跪素牙玉潔載籍所美服重致遠行如丘
徙格物總論象外國所產身長丈餘高稱之大六尺
餘長鼻牙耳鼻俱垂牙亦長丈許鼻端有爪豬目睛黑
援神契神靈滋液百寶爲用則白象至瑞應圖王
者自養有道則白象至負不死藥來北戶錄凡象白
者西天有之又供御陀國有青象皆中夏所無西陽
雜俎龍象六十歲骨方足今荆地象色黑兩牙江豬也
咸亨二年周澄國遣使上表言訶伽國有白象口垂四

牙身運五足象之所在其土必豐以水洗牙飲之愈疾
嶺表錄異廣之屬郡潮循州多野象牙小而紅楚越
之間象皆青黑唯西方拂林大食國即多白象內典
同在佛所聞說一味之法然所証各有淺深譬兔馬象
三獸渡河兔渡則浮馬渡及半惟大香象徹底截流
桂海虞衡志象出交趾山谷惟雄者有兩長牙佛書云
白象又云六牙今無有象頭不可俯頸不可回口隱於
頤去地尚遠運動以鼻爲用一軀之力皆在鼻將行先

以鼻拄地乃移足知其足力劣於鼻也鼻端甚深可以
開闔取物中有小肉夾雖芥子亦可拾每以鼻取食即
就爪甲擊去泥垢而後捲以入口飲水亦以鼻吸而捲
之足如柱無指而有爪甲五枚形如大栗登高山下峻
坂涉深水形擁腫而甚捷草木子象行能別虛實稍
虛輒不肯過故帝王鹵簿以為前導酉陽雜俎古訓
言象孕子五歲始生寰宇記象被傷則羣黨相扶將
去則向南跪拜鳴三匝以木覆之酉陽雜俎象性久

識見其子皮必泣 博物志象各有雌雄其一雌死百有餘日其雄塗土著身獨不飲酒食肉或問其所以輒流涕若有哀狀 酉陽雜俎環王國野象成羣一牡管牝三十餘牝者牙纔二尺迭供牡者水草臥則環守牝象死共它地埋之號吼移時方散又國人養馴者可令代樵 嶺表錄異雲南豪族各家養象負重致遠如中夏之畜牛馬也 海語象嗜稼凡引類於田必次畝而食不亂蹂也未旬即數頃盡矣島夷以孤豚縛籠中懸

諸深樹孤豚被縛喔喔不絕聲象聞而怖乃引類而遁
不敢近稼 酉陽雜俎南人言象尤惡犬聲獵者裹糧
登高樹構熊巢伺之有羣象過則爲犬聲悉舉鼻吼叫
循守不復去或經五六日困倒則下潛刺殺之 桂海
虞衡志欽州人能捕象象行觸機則必下擊之中其要
害必死將死以牙觸石折之以牙爲身災也非要害則
負必而行肉漬則必脫傷其鼻亦死鼻傷之瘡不可合
故亦致死殺一象材衆飽其肉鼻肉最美熟而加糟糟

透巒而食之 安南志林邑人殺象象怒布陣以鬪之
人登樹取衣掛樹枝緣他樹而走象見衣以爲人存以
鼻汲水灌樹且倒不見人怒踏碎其衣而去 桂海虞
衡志羣象雖多不足畏惟獨象最可畏蓋其强悍不容
於羣獨行無所忌遇其肆毒以鼻捲人擲殺蹴其血流
吸飲之 宋莘視聽抄鄭文振潮陽人言象爲南方之
患土人苦之不問蔬穀守之稍不至踐食之立盡性嗜
酒聞酒香輒破屋壁入飲之人皆於其來處架高木若

望火樓然常有人直象獨畏烟火先用長竿接茅把於其杪望見其來共然火把持竿以指之即去隨之三數里方敢回恐其復來也眼惡蠅蚋有日色則不出羣行者猶庶幾其獨行者最喜傷人蓋勢孤恐人害之也土人懸巨木設機壓之能殺惟象鞋者用厚木當中鑿深竅方容其足中植大錐其末上向竅之外周回浚鑿之如今之唾盂而加峻密密埋於其往來之所以草覆之倘投足木上必滑下竅中其既著錐洞貫其足不能自

拔即仆負其痛不能食展轉謂之著鞋然猶能以牙傷
人人未敢近數日後稍困則衆鎗攢殺之而分其肉留
其皮赴濕切作條絣乾連枷等用自潮陽來必經由夔
江嶺此處最多先使人行前探之或遇其大羣有候數
日不去不敢行者監司巡歷則其保甲鳴邏鼓趕逐之
頑然若無聞也必俟其自散去乃敢過 虞衡志交趾
出象處曰象山歲一捕之山有石室惟通一路周圍皆
石壁先置蒟豆於中驅一馴雌入焉布甘蔗於道以誘

野象象來食蔗則縱馴雌入野象羣誘以歸石室隨以
巨石室門象饑人緣石室飼馴雌野象見雌得食亦狎
而來求飼益狎則鞭之少馴則騎而制之久則漸解人
意又爲立名字呼之則應 法句喻經佛問象師調象
之法有幾答曰有三一者剛鉤鉤口著其鞮鞬二者減
食常令饑瘦三者捶杖加其楚痛由鐵鉤鉤口故以制
強口由不與食飲故以制身獷由加捶杖故以服其心
埤雅服馴巨象以小斧斲之其金瘡見星月即合

談苑象耳中有油出謂之山性發往往奔逸傷人牧者視象耳有油出則多以索縻之 酉陽雜俎象耳穴薄如鼓皮一刺而斃 物類相感志象胃小橫骨令人浮水燒灰酒服之其身必浮不沒若食其肉令人體重其牙每雷震必倉卒間似花暴出逡巡隱沒 安南志象病首必向南而死肉麤連皮煮易熟牙筭足掌肉稍佳 虞衡志象皮可以爲甲或條截之捶之至乾治以爲杖 陳藏器本草象具十二生肖肉各有分段惟鼻

是本肉炙食更美 五雜組呂氏春秋曰肉之美者有
髦象之約焉約即鼻也 圖經象膽不附肝隨時在諸
肉間淳化中上苑一馴象斃太宗命取膽不獲使問徐
鉉鉉曰當在前左足旣而剖足果得又問其故鉉曰象
膽隨四時今其斃在春故知在足也 埤雅象能浮水
出沒體具十二肉膽隨月轉假令正月建寅即膽在其
虎肉或曰膽隨四時在足春在前膊左夏在前膊右也
暇日記舊說象膽在足余見寧陵簿田世程說象營

死三象其二膽果在足其一不在足或言膽隨四時在四足未必然也皮骨齒皆輸內香藥庫其肉斤賣肉理段段不相屬味各不同舊說肉干味其然耶 宋祁筆

記韓非子曰人希見生象得死象圖之又索其圖以想其生也故人所以意想者皆謂之象 北戶錄梁翔法師白象一名伽那 異苑始興陽山俗呼象爲大客

清異錄陸象山家避諱號象爲鈍公子 天中記象之大者曰豫 格物總論象雖魁梧而蚺蛇能吞之三歲

而出其骨則又有大於此者

馴象

漢書武帝時南海獻馴象注能拜隨人意 晉

書象車漢鹵簿最在前晉武平吳後南越獻馴象詔作
大車駕之以載黃門鼓吹數十人使越人騎之元正大
會駕象入庭 通典國朝象亦居先設木蓮花坐金蕉

明皇雜錄明皇每賜酺御樓引大象或拜或舞動合
音律後祿山驅掠舞象入洛大設聲樂象皆瞪目憤怒
略無拜舞者祿山慙怒盡坑殺之 嶺表錄異蠻王宴

漢使於百花樓樓前入舞象曲動樂作優倡引入象以
金羈絡首錦繡垂身隨拍騰蹋動頭搖尾皆合節奏即
天寶中舞馬之類也唐乾符四年占城國進馴象三頭
當殿引對亦能拜舞後放還本國 五雜組今朝廷午
門立仗及乘輿鹵簿皆用象不獨取以壯觀以其性亦
馴警不類他獸也象以先後爲序皆有位號食幾品料
每朝則立午門之左右駕未出時縱遊翫草及鐘鳴鞭
響則肅然翼侍俟百官入畢則以鼻相交而立無一人

敢越而進矣朝畢則復如常有疾不能立仗則象奴牽詣他象之所面求代行而後他象肯行不然終不往也有過或傷人則宣勅杖之二象以鼻絞其足踣地杖畢始起謝恩一如人意或貶秩則立仗必居所貶之位不敢仍常立甚可怪也六月則浴而交之交以水中雌仰面浮合如人焉蓋三代之時已有之而晉唐業教之舞及駕乘輿矣此物質既麤笨形亦不典而靈異乃爾伽藍記後魏洛水橋南道東有白象坊白象者永平二


年乾陀羅國所獻背設五采屏風七寶坐牀容數十人
真是異物 五雜組滇人蓄象如中夏畜牛馬然騎以
出入裝載糧物而性尤馴又有作架於背上兩人對坐
宴飲者遇坊額必膝行而過上山則跪前足下山則跪
後足穩不可言有爲賊所劫者窘急語象以故象即捲
大樹於鼻端迎戰而出賊皆一時奔潰也 虞衡志蠻
首出入多乘象其貢中國者背施鞍架御座號羅我象
額編金鈴千數枚行則琅琅然交人有犯惡者臥之地

使象蹴殺之 朝野僉載安南有象能知人之曲直有
鬪訟者行立而顛之有理者即過負心者以鼻捲之擲
空中數丈以牙接之應時碎矣 唐書驃國王宮有巨
白象高百尺訟者焚香跪象前自思是非而退有災疫
王亦對象跪自咎 左傳吳伐楚昭王使執燧象以奔
吳師杜預注燒火燧繫象尾使赴吳師驚却之 後魏
書乾陁國好征戰有鬪象七百頭十人乘一象背執兵
虞衡志牧者謂之象奴又名象公凡制象必以鉤象

奴正跨其頸以鐵鉤鉤其頭欲其左鉤頭之右欲右鉤左欲却鉤額欲前不鉤欲其跪伏以鉤正案其腦案之痛則號鳴人謂象能聲喏者此也其行列之齊皆有鉤以前却左右之其形雖大而不勝痛故人得以數寸之鉤馴焉馴之久者象奴來則低頭跪前左膝人踏之以登則奮而起行格物總論古者典廐象一給二丁日給藁六圍稻菽各三斗鹽一升非此不足飽其欲象異皇甫謐帝王世紀舜葬蒼梧下有羣象常爲之

耕禹葬會稽祠下有羣象耕田 山川紀異河南府有
象莊舊傳漢時西域僧以象馱經至洛陽化爲石今石
象猶存 續博物志唐李德裕好餌雄朱有道士李終
南出一玉象狀如拳曰此可求勾漏瑩徹者爲餌燃香
致象鼻下勿令婦人雞犬見之三五日象自服之即復
吐出乃可服此火王太陽之精凝結已三萬年以相公
好道因以奉借又出金象云此是雌者貴其相伴不爾
玉象飛去德裕服之顏面愈少後南遷再遇道士索二

象是夕風雨濤瀨并作二象如團火自然飛出



格致鏡原卷八十二

謹案卷八十第七頁後八行寇宗奭常官于醴州

原本醴訛禮據本草衍義改 第十三頁前一

行江淮謂羣鶴旋飛為鶴井鶴亦好旋飛原本

井鶴訛并鶴據酉陽雜俎改 第十六頁前三

行下嘴謂藏其喙于翼間原本謂訛諸據張華

禽經註改 第二十一頁前四行火鷄出滿刺

加山谷原本滿訛蒲據郭憲洞冥記改 第二

十六頁後八行駕鷺野鷺也原本駕訛駕今改

卷八十一第十五頁前四行好自懸于樹也原本

自訛似今改 第二十一頁前五行丑陽之山

有鳥焉其狀如鳥而赤足名曰馼餘原本馼餘

訛馼餘據山海經改 後六行符愚山有鳥名

鴟原本鴟訛鴟據山海經改 第二十二頁後

一行天帝山有鳥如鶉黑文赤翁原本鶉訛鶉

據山海經改 第二十五頁後六行主為西王

母取食者別自棲息于此山也原本別訛引據

欽定四庫全書

子部

格致鏡原卷八十三至五

詳校官中書_臣羅錦森

侍讀_臣孫球覆勘

總校官中書_臣朱鈐

校對官原任典簿_臣郭祚熾

謄錄監生_臣楊其梓

欽定四庫全書

格致鏡原卷八十三

大學士陳元龍撰

獸類二

熊 附羆 能

總論 說文熊似豕山居冬蟄春出 詩義疏熊能攀
緣上高樹見人則顛倒投地而下 述異記熊獸藏於
山穴穴裏不得見穢及傷殘見則合穴自死 墨客揮
犀熊以山中行數十里悉有跬伏之所必在石崑枯木

中山民謂之熊館唯虎出百里外則迷所出道路 瑣
碎錄熊食少許鹽即宛轉而死 抱朴子熊壽五百歲
則能化爲狐狸 寶雞錄熊得人輒搔人喉若腋令笑
人仆舌舐面血以爲快人屏氣陽死乃棄去還視之再
三人蘇欲起逃去追而扼之山民習其狀能脫於死
埤雅熊好舉木而引氣謂之熊經莊子所謂熊經鳥伸
是也冬蟄不食饑則自舐其掌故其美在掌 左傳楚
成王見圍請食熊蹯而死注蹯掌也熊蹯難熟冀有外

救 本草會編熊掌古最重之得酒醋水三件煮熟則
臍大如皮毬 酉陽雜俎熊膽春在首夏在腹秋在左
足冬在右足 劉跂暇日記熊膽奇藥家有小兒者不
可無此佳者通明如米粒用草筴點入水轉如飛惟性
急者良 淮南子熊當心有白脂如玉味甚美俗呼熊
白 本草經熊白味甘微溫無毒止風痺 埤雅熊羆
富脂至春臍癢即登高木自墜謂之撲臍今人畜熊以
挺撻之更致壯長蓋倣於此 周禮穴氏掌攻螫獸各

以其物火之註謂熊羆之屬冬藏者燒其所食之物於穴外誘出之 異苑熊居大樹孔中東土呼熊爲子路以物擊樹云子路可起於是便下不呼則不動 廣異記巴西有巨熊稱六雄將軍 左傳昔堯殛鯀於羽山其神化爲黃熊以入於羽淵 武帝紀注禹治水通轅轅山化爲熊謂塗山氏曰欲餉必聞鼓聲乃來禹排石誤中鼓塗山氏往見禹方作熊慙而去

詳類 援神契神靈滋液百珍寶用則赤熊見赤熊見

則奸宄自遠 六韜周文王拘於羑里散宜生得黃熊
獻紂免西伯之難 周書成王時不屠國進青熊 西

京雜記趙飛燕女弟居昭陽殿玉牀白象牙簾綠熊席
席毛長二尺餘人眠而擁毛自蔽望之不能見坐則沒
膝其中雜熏諸香一坐此席餘香百日不歇 宋書元

嘉二十年白熊見新安歙縣太守到元度以獻 魏志

大秦國出玄熊 唐書貞觀三年南蠻首元深入朝冠

烏熊皮 山海經倫山之熊如麋其川在尾上郭璞注

川竅也 爾雅翼有豬熊馬熊人熊人熊卽魑 爾雅

魑如小熊竊

古淺字

毛而黃郭注狀如熊而小毛淺赤黃

色俗呼赤熊爲魑也 五雜組新安樵者得小熊大如

猫蹣跚庭中犬至猛者見之亦溺下 酉陽雜俎唐高

宗時伽毘葉國獻天鐵熊大如狗蒼色能擒獅象虎狼

羆 爾雅羆如熊黃白文註似熊而長頭高脚猛慙多

力能拔樹木關西呼曰貍羆 埤雅羆似熊而大從目

能緣能立遇人則擘而攫之俗云熊羆眼直惡人橫目

其白生於心之下育之上亦如熊白而麕秋冬則有春
夏則亡一說羆有黃赤二種披髮人立絕有力者爾
雅翼獵者云熊是其雄羆則熊之雌者羆力尤猛詩
義疏羆有黃羆有赤羆大於熊其脂如熊白而不如熊
白美也

能說文能熊屬足似鹿獸之堅中而彊壯者故謂人
強幹曰能述異記陸居曰熊水居曰能

猩猩

爾雅猩猩小而好啼註山海經曰人面豕身能言語今

交趾封谿縣出猩猩狀如獐狔聲似小兒啼 禮記猩

猩能言不離禽獸 萬畢術猩猩知往 文選注猩猩

獸名熊之類也性好酒醉則不能行乃啼爲人所擒俗

云猩猩啼而就擒 獨異志漢黃霸爲封谿令部人陳

廉攜酒并猩猩以獻霸問曰何物人未及應囊中語曰

斗酒并僕耳霸以其物有靈開囊放之猩猩悲啼而去

呂氏春秋肉之美者猩猩之脣 水經注武平封溪

縣有獸曰猩猩猿形人而顏容端正善與人言音聲妙麗如婦人對語聞之無不酸楚其肉食之窮年無厭可以辟穀 格物總論猩猩毛翠色能知人姓名及人先世名字與人家往事在山谷間數百爲羣取其血染毛罽色鮮不黯 國史補猩猩好酒與屐人欲取者置二物以誘之猩猩始見必大詈云誘我也乃絕走而去之去而復至稍稍相勸頃盡醉其足皆絆 朝野僉載猩猩如美人解人語知往事以嗜酒故以屐得之檻百數

同牢欲食之衆自推肥者相送流涕而別 蟬史猩猩嗜酒著屐見酒相與連臂號泣同就醉躡屐舞而仆每捕獲必箠之使自言血幾何猩猩惜其血必少應益痛撻之乃增多至必不肯言則殺之所得血如所許之數雲嶠類要談苑云宋太祖平嶺南求得猩猩如雄鴨而大取其血染色如渥丹與傳記所載不同

狒狒

爾雅狒狒如人被髮迅走食人註梟羊也山海經曰其

狀如人面長脣黑身有毛反踵見人則笑交廣及南康
郡山中亦有此物大者長丈許俗呼之曰山都一名曰
顓 郭璞狒狒讚狒狒怪獸被髮操竹獲人則笑脣掩
其目終亦號跳反爲我戮 酉陽雜俎狒狒飲其血可
以見鬼力負千斤笑輒上吻掩額狀如獼猴作人言如
鳥聲能知生死血可染緋髮可爲髮舊說反踵獵者言
無膝睡常倚物 周書王會周成王時州靡國獻萬萬
人身反踵自笑笑則上脣翕其目食人北方謂之吐噀

庶物異名疏萬萬臯羊也吳都賦萬萬笑而被格狀
如人披髮迅走見人則執手而笑乃食之人因以竹筒
致臂而與之則執筒而笑笑則脣上掩其目人抽臂以
鑿綴其脣於額而殺之羽獵賦作噪陽 鄧德明南康
記山都形如崑崙奴通身生毛見人輒閉目張口如笑
好在深澗中翻石覓蟬噉之 異物志廬陵大山之間
有山都似人裸身見人便走自有男女長四五尺

狼
附豺

說文狼似犬銳頭而白頰高前廣後 草木子狼善視

詩疏狼牡名獾牝名狼其子名獾有力者名迅其鳴
能小能大善爲小兒啼聲以誘人去數十步止其猛捷
者人不能制雖善用兵者亦不能免也其膏可煎和其
皮可爲裘 埤雅里語狼卜食狼將遠逐食必先倒立
以卜所向故今獵師遇狼輒喜蓋狼之所嚮獸之所在
也其靈智如此故古之造式者木用槐瘻棗瘻而以狼
牙爲柱取其靈智也 詩幽風狼跋其胡載橐其尾註

狼老者項有懸肉 草木子狼尾一孔三毛 周禮獸
人冬獻狼注狼膏溫故冬獻之 酉陽雜俎狼大如狗
蒼色作聲諸竅皆沸脰中筋大如鴨卵有犯盜者燒此
筋以烟熏之當令手攣縮或言狼筋如織絡小囊蟲所
作也 全雅狼腸直故作聲諸竅皆沸 埤雅古之烽
火用狼糞取其烟直而驟雖風吹之不斜 物類相感
志狼貪殘之獸也取皮掛羊棧羊不出門 名物攷案
狼之喻最多言其恣食則曰狼餐言其恣取則曰狼貪

言其威顧則曰狼顧言其亂走則曰狼竄言其陸梁則
曰狼扈言其專愎則曰狼狠言其不恤則曰狼戾言其
不檢則曰狼籍言其乖謬則曰狼狽 蟬史狼起臥游
戲多藉其草而草皆穢亂故里語云狼藉又曰狼扈
酉陽雜俎狼狽是兩物狽前足絕短每行常駕兩狼失
狼則不能動故世言事乖者稱狼狽 抱朴子狼壽三
百歲則解暫變化為人形 白澤圖百歲狼化為女人
名曰知女狀如人坐道傍告丈夫曰我無父母兄弟丈

夫娶爲妻三年而食人以其名呼之則逃去 述異記
周幽王時羊化爲狼洛南有避狼城云幽王時羣羊爲
狼食人故築城避之今洛中有狼村是其處也 北史
突厥之先爲鄰國所破有一小兒棄草澤中有北狼以
肉飼之及長與狼交合遂有孕焉逃於高昌國北山洞
穴遂生十男長大外託妻孕其後各爲一姓阿史那即
其一也 北史突厥旗纛之上施金狼頭侍衛之士皆
爲附離夏言亦狼也 張瀆宣室志張鋌遇巴侯置酒

邀滄浪君至一人衣蒼其質魁岸天將曉鋌悸寤見一
狼臥於前蓋所謂滄浪君也 抱朴子山中寅日稱當
路君者狼也 瑞應圖白狼金精也上有仁德明哲則
見 田俅子商湯爲天子都於亳有神手牽白狼口銜
金鉤而入湯庭 郡國志紹慶府山出野狼眼在背上
能食諸獸 吳都賦注麋狼大如麋角向前有枝下出
反向上長者四五尺常居平地不得入山林 異物志
麋狼形似鹿兩角觸前向入林則挂角恒在平淺草中

逐入林則得之皮可作履襪角正四據南人因以作踞
牀

豺 禮月令季秋豺乃祭獸戮禽註祭獸者祭之於天
戮禽者殺之以食也 埤雅豺狗足似狗而長尾白頰
高前廣後其色黃季秋取獸四面陳之以祀其先世

埤雅瘦如豺豺柴也豺體細瘦故謂之豺棘人骨立謂
之豺毀義取諸此 山堂肆考俗云羣豺噬虎言其健
猛且衆可以窘虎也史云豺見虎睡則遶而溺之虎不

能起遂噬之又云豺舌似棘

鹿

附麋麀鹿
麋麀

總論 春秋運斗樞瑤光散而爲鹿江淮不祠則瑤光
不明璣生鹿 家語四九三十六六主律律主鹿鹿故
六月而生 熊氏曰鹿孕子於仲秋而生於春 古今
注鹿有角而不能觸 爾雅疏鹿解角獸也羣萃善走
者也 埤雅鹿性警防分背而食以備人物之害蓋鹿
萃善走者分背而食食則相呼羣居則環其角外向以

防物之害已

瑣碎錄鹿夜臨宿下鹿角寨大者角向

外四圍小者在中團圍如寨今人以木倣作鹿角寨

蟬史鹿牡有角無齒牝有齒而無角無齒謂上齧無齒有齒謂上齧有齒若下齧則牝牡俱有齒也 戒菴漫

筆鹿初生鼻邊有缺者是雄 天玄主物簿鹿者仙獸

常自能樂性從其雲泉至六十年必懷瓊於角下角有斑痕紫色如點行或有涎出於口不復能急走矣 抱

朴子鹿壽千歲滿五百歲則色白

劉向列仙傳鹿一

千歲爲蒼鹿又百年化爲白鹿又五百年化爲玄鹿
埤雅麋鹿亦喜紅南人取之則衣絳服而舞麋鹿輒注
視不動因以利刀刺之天中記鹿性嗜醎灑鹽於地
以誘鹿射之遼穆宗時舐醎鹿於玉山黃山谷帖胡
居士嘗言鹿性驚烈多別良草恒食九物餘則不嘗羣
處必依山岡產歸下澤享神用其肉者以其性烈清淨
故也凡餌藥者勿食鹿肉服藥必不得力以鹿嘗啖解
毒之草是故能制毒散諸藥也九草者葛葉及花鹿蔥

鹿藥白蒿水芹甘草齊頭蒿山耳薺芄 虎薈山中人
言凡鹿羣出則十數老雄當先衆雌從中行又十數雄
殿之其行止一視在前之雄豎尾所向一遇虎則當先
者皆挺其角當之以俟衆雌逸去然後去虎亦瞪視無
如之何夜臥則一鼻抵一谷道環而臥或云鹿接臥其
氣貫通不絕故其壽極久 呂溫由鹿賦序野人繫鹿
問之答曰此爲由鹿由此鹿以誘致羣鹿也此鹿每有
所至輒鳴嗥不食者累日 宋祁筆記唐呂溫作由鹿

賦曰由此鹿以致他鹿故曰由鹿予案說文曰率鳥者
繫生鳥以來之名圖音由呂得其意而不知說文有
此圖字也 北夢瑣言江陵松滋枝江村射鹿者率以
淘河烏脰骨爲管以鹿心上脂膜作簧吹作鹿聲有大
號小號呦呦之異或作麀鹿聲則麀鹿畢集蓋爲牝聲
所誘人得彀矢而注之南中多鹿每一牡管百頭至春
羸瘦蓋遊牝多也及夏則唯食菖蒲一味却肥當角解
之時其茸甚痛獵人逢之其鹿不敢逸走伏而不動獵

者以繩繫其茸截而取之先以其血來噉然後斃鹿
孔六帖陸紹弟爲盧氏縣尉常觀獵忽遇鹿五六頭臨
澗見人不驚毛斑如畫獵者言此仙鹿也射之不能傷
且復不利 酉陽雜俎胡珣爲虢州時獵人殺得鹿重
一百八十斤蹄下貫銅環上有篆字博物者不能識

月令仲夏鹿角解仲冬麋角解方氏注鹿好羣而相比
陽類也故夏至感陰氣而角解麋多慾而善迷陰類也
故冬至感陽氣而角解 蟬史麋一年角如釘二年角

二臺三年三臺至四臺每年解而復生若四歲之鹿一
解角之後一生便有四臺角也 衝波傳鹿生三年其
角自墮 古今錄驗人患妖魅鬼病不肯言者以鹿角
屑擣散水服之 蟬史凡物骨肉之易長者莫速于鹿
故鹿角能補氣血爲諸藥之最凡鹿白臆者不可食
續松漠紀聞麋角與鹿角不同麋角如駝骨通身可車
卻無紋生枝不比鹿小鹿頂骨有紋上下無之亦可熏
成紋 酉陽雜俎木耳夷舊牢西以鹿角爲器 續松

漢紀聞鹿頂合燕以北者方可車須是未解角之前才解角血脈通冬至方解頂之上爲合正須亦作合好者有人字不好者成八字有髓眼不實北人謂角爲鹿角合頂爲鹿頂合

南中止有鹿角合

南鹿不實定有髓眼不可車

北地角未老不至秋時不中 埤雅麋茸利補陽鹿茸利補陰凡茸無樂太嫩世謂之茄子茸但珍其難得耳其實少力堅者又太老惟長數寸破之肌如朽木茸端如馬腦紅玉者最善 藥議按月令冬至麋角解夏至

鹿角解陰陽相反如此今人用麋鹿茸作一種殆疎也
又用刺麋鹿血以代茸者云茸亦血爾此大誤也 地
記首陽山在蒲州南四十五里上有二賢祠二賢像宋
元祐中所塑其前塑一白鹿土人曰二賢食薇兼飲鹿
乳故塑之 南史扶南國有鹿車國人畜鹿如中國畜
牛取乳爲酪 說文麗旅行也鹿之性見食急則必旅
行禮麗皮納聘蓋鹿皮也 史記古者皮幣諸侯以聘
享漢武帝乃以白鹿皮方尺緣以藻繢爲幣直四十萬

王侯朝覲享聘必以爲薦 盧氏雜記唐明皇命射生
官射鹿取血煎鹿腸食之謂之熱洛河 孔六帖號國
夫人就屋梁懸鹿腸於半空筵宴使人於梁上注酒於
腸中結其端欲飲則解開流於盞中號洞天聖酒將軍
酉陽雜俎梁劉孝儀食鯖鮓魏使崔劼李騫在坐孝
儀曰鄴中鹿尾乃酒饋之最飭曰生魚熊掌孟子所稱
雞跖猩唇呂氏所尚鹿尾乃有奇味竟不載書籍每用
爲恨孝儀曰寔是如此或古今好尚不同梁賀季曰青

州蟹黃乃爲鄭氏所記此物不書未解所以騫曰鄭亦
稱益州鹿痿但未是尾耳 祥驗集唐寶曆二年春范
陽節度使朱克融獵鹿鹿膽中得珠如彈丸黑色初軟
後硬如石光明 談苑吳長文使虜虜人打圍無所獲
忽得一鹿請南使觀之須臾剝剔了已昏夜矣數兵煮
其骨食之皆嘔血吳左丞畱雙腎於銀器中云此最補
煖旦欲薦之翌日銀器內皆黑色乃毒矢所斃爾不敢
洩埋之而去 投荒雜錄雷郡有鹿腥無味不可食俗

云海魚所化郡人嘗見魚首而身爲鹿者 三元參贊
五月勿食鹿肉傷神豹文者殺人鹿茸不可嗅鹿肉痿
人陰 清異錄道家流書言麀鹿麀是王署三牲神仙
所享故奉道者不忌 道書陶隱居云麀鹿非辰屬又
八卦無主卽生死無由故道家許聽爲脯 玄覽鹿食
龜麀食蛇 山川記蚺蛇吞鹿至角乃止

詳類 說文牡鹿曰麀牝鹿曰麀又作麀鹿迹曰麀麟
大牝鹿也麀麀麀也麀鹿子也麀鹿之絕有力者也

格物論麋鹿之大者 說文鹿子又曰麋一歲曰麋二
歲曰麋三歲曰麋 禮書鹿之爲物善接其類而麋尤
出於天性故先王取焉 瑞應圖夫鹿者純善之獸也
道術得則白鹿見王者明惠及下則見 晉徵祥說白
鹿仁獸也色若霜雪不與他鹿爲羣 瑞應圖黃帝時
西王母使乘白鹿獻白環 崔玄山李母碑老子乘白
鹿下託於李母 仙鑑老子騎青鹿上昇 述異記漢
成時中山人得玄鹿烹之骨皆黑色仙者說玄鹿爲脯

食之壽二千歲 孔六帖黠戛斯有鹿黑尾 寰宇記
張掖南山出赤鹿足短而形大如牛肉千斤 金樓子
夏禹之時神鹿行於河水 廣博物志黃列子者嘗遊
獵九江射中五色神鹿逐跡尋穴遇神芝服而得仙
珍玩續考神鹿大如巨豬高三尺許前半截甚黑後半
截白花毛純可愛嘴如豬嘴不平四蹄如豬蹄脚有三
趾止食草木不食腥出舊港國 爾雅翼古稱馬似鹿
者直百金今荆楚之地鹿似馬當解角時望之與馬無

異土人呼爲馬鹿 埤雅北方戎狄中有駝鹿極大而色蒼尻黃而無斑亦鹿之類角大而有文堅瑩如玉其茸亦可用 隣幾雜志駝鹿重三百斤效其聲致之茸如茹者切食之 彙苑詳註福鹿身如騾樣白面眉心細細青條花起滿身至四蹄條間通如畫 穆天子傳天子賜曹奴之人黃金之鹿 孔六帖北狄渤海俗所貴者曰扶餘之鹿 事物紺珠蠟蟲鹿出西域取其肉汁釀數日成酒醉人

別名 鄭嵎津陽門詩長生鹿瘦銅牌垂注上嘗於芙蓉園獲白鹿惟王昊山人識之曰晉時鹿也上異之令左右周視之乃於角際雪毛中得銅牌子刻之曰宜春苑中白鹿上由是愈愛之移於北山字之曰山客 翻譯名義集佛書謂鹿爲伊尼 抱朴子山中卯日稱西王母者鹿也知其物名則不能爲害 海錄碎事鉅鹿侯鹿也 清異錄武宗十玩圖謂鹿爲茸客 清異錄華清宮一鹿千年精俊不衰人呼曰角仙 本草鹿一

名斑龍鹿與游龍戲必生異角鹿得稱龍以此

異鹿 博物志雲南郡出茶首其音爲蔡茂是兩頭鹿名也獸似鹿兩頭其腹中胎常以四月中取可以治蛇虺毒永昌亦有之 魏宏南中志雲南郡有熊倉山上有神鹿一身兩頭而角衆列能食毒草名食毒鹿 古今注明帝永平中三角鹿出江陵孝和帝永元中豫章徐汙得白鹿高丈九寸 偃曝談餘按秘閣有李贊華畫千角鹿崇寧四年秘閣收畫以入使者疑其狀且求

古有是類者當得其名以備顧問董道謂邪希有鹿兩頭而角且千道書有五頭鹿其角且千皆古之異鹿也物類相感志科藤麕鹿出合浦康頭山其額上戴科藤一株四條直上各高一丈許其生長若植在上也

偃曝談餘永徽四年來州有異獸高丈餘一角鹿形馬蹄牛尾五色有翅乃知獸有似鹿而非鹿種者甚多

鹿異 洽聞記常州江陰縣東北石筏山者梁時有伐材人入此山見有麕鹿產仍聞小兒啼聲往視見產一

女子因收取養之及長乃令出家爲道士時人謂之鹿娘
五行記有一士人姓車是淮南人天雨舍中獨坐
忽有二年少女來就之著紫纈襦立其牀前共語笑車
疑之天雨如此女人從外來而衣服何不沾濕必是異
物其壁上先挂一銅鏡徑數寸回顧鏡中有二鹿在牀
前因將刀砍之而悉成鹿一走去獲一枚以爲脯食之
述異記漢成帝末年宮中雨一蒼鹿殺食之味甚美
九色鹿經昔有一菩薩身爲九色鹿毛色九種角白

如雪常在恒水邊飲食水草與一鳥爲知識 獨異志
上虞蘭室山葛玄所隱之處有隱几化爲鹿鹿鳴卽縣
令有罪

麋 爾雅疏麋總名也其牡者名麋其牝者名麋詩古
曰云其麋孔有是也其所生之子名麋其腳跡所踐之
處名躔其絕異壯大力者名狄也 白虎通麋水獸
也青黑色肉蹄一牡能乘十牝鹿屬也 埤雅麋善迷
而害稼 熊氏曰麋孕子於仲春而生於秋 埤雅麋

四目其二夜目也類從所謂麋目下有竅夜卽能視是也故淮南子曰孕婦見麋而子四目周禮獸人夏獻麋注麋膏涼故夏獻之埤雅凡含血之物肉最易長其次角難長最後骨難長故人自胚胎至成人二十年骨髓方堅唯麋角自生至堅無兩月之久大者乃重二十餘斤其堅如石計一夜須生數兩凡骨之頓成生長神速無甚於此雖草木至易生者亦無能及之此骨血之至强者所以能補骨血堅陽道強精髓也招北客

文巨麋如牛脩角如劍 博物志麋掘澤草而食其場
成泥名曰麋畷民隨此畷種稻其收百倍 魏略文帝
將受禪有白麋見 抱朴子山中卯日稱東王父者麋
也 本草陳藏器云蔡苴機兩頭麋也一名蔡余義

麋 祖庭事苑鹿之大者曰麋羣鹿隨之唯其所往麋
尾旋轉爲準於文從鹿主古之談者揮焉取諸此也

華陽國志鄆縣宣君山出麋尾一名荒鹿 埤雅麋獸
似鹿而大其尾辟麋以置褱帛中能令歲久紅色不黧

又以拂氈令氈不蠹

麕 格物總論麕小於獐但口兩邊有長牙好鬪則用其牙皮爲第一無出其右者然多牙傷痕四方皆有山深處則多其聲如擊破鉢 本草李時珍曰麕似麋而小牡者有短角黑色豹脚脚矮力勁善跳越皮細膩宋書銀麕刑罰得中民不爲非則至 符瑞志色白者

曰銀麕施州一種色丹者曰紅麕 六書故麕音京麕同

類似鹿而角不岐毛不斑麕大麕小麕毛差黑而麕

地理志山多麋麋師古注麋似鹿而大麋似鹿而小

麋 春秋運斗樞樞星散爲麋 爾雅疏麋麋也麋其

總名也牡名麋牝名麋其子名麋其迹名解絕有力者

名𦍋 六書故麋似鹿而脂黃亦謂黃羊 本草李時

珍曰麋似鹿而小無角雄者有牙出口外 古今注麋

有牙而不能噬麋臍下亦有香但不全耳 埤雅麋鹿

皆健駭而麋性膽尤怯飲水見影輒奔道書曰麋鹿無

魂又曰麋鹿白膽善怖爲是故也 抱朴子山中未日

稱赤吏者麋也 符瑞志白色者曰銀麋 說文白麋
王者刑罰理則至 晉起居注咸寧中白麋見魏郡後
諸州各送白麋 本草麋無香有香者麝也俗呼土麝
爲香麋

麝 字林麝小鹿有香其足似麋故曰麝足 嵇康養
生論麝食栢而香 趙辟公雜說西北之麝噬虺而食
栢故其香結東南山谿有松而無栢故麝不結也 埤
雅麝絕愛其香每爲人所迫逐勢且急卽自投高巖舉

爪剔出其香就繫且死猶拱四足保其臍 香譜唐本草云麝生中臺川谷及雍州益州皆有之陶隱居云形似麝常噉蛇或於五月得者往往有蛇皮骨主辟邪殺鬼精中惡風毒療傷多以一子真香分糲作三四子刮取血膜雜以餘物大都亦有精麤破皮毛共在裏中者爲勝或有夏食蛇蟲多至寒香滿入春臍內患急痛自以脚剔出置屎溺中覆之人有得之者此香絕勝帶麝非但香辟惡以香真者一子著腦間枕之辟惡夢及尸

疰鬼氣 埤雅麝啗蛇今以蛇蛻裹麝彌香 本草蘇
頌曰麝香有三等第一生香名遺香乃麝自剔出者次
臍香乃捕得殺取之其三心結香乃麝見大獸捕逐驚
畏失心墜死人得之破心見血作乾血塊者不入藥
香譜唐天寶中漁人獲水麝臍香皆麝每取以針刺之
流出如水漚一滴入斗水中用灑衣物香不歇倍於肉
麝

駝

山堂肆考橐駝一名駱駝

子虛賦駟駘橐駝師古注

橐駝者言其可負橐囊而駝物故以名云 格物總論

橐駝大於水牯紫色耳垂 山堂肆考駝背有兩峰如

馬鞍名曰駝峰駝足三節長頸色蒼褐凡負物屈足受

之載未盡量終不起 山海經陽光之山其獸多橐駝

善行流沙中日行三百里負千斤 博物志燉煌西渡

流沙往外國千里餘中無水時有伏流處人不能知橐

駝知水脈過其處輒停不行以足踏地人於所踏處掘

之則得水

後周書異域傳鄯善古樓蘭國也西北有

流沙數百里夏日亦有熱風爲行旅之患風欲至唯老
駝知之卽鳴而驟立埋其口鼻於沙中人每以爲候亦
卽將氈擁蔽鼻口其風迅駛須臾過盡若不然者必至
危斃 義訓駝之聲曰圓 瑣碎錄駝峰倒者齒老矣
少健者峰直 酉陽雜俎駝毛絁溫厚煖於狐貉遇夏
常退毛至盡乃能避熱故古者冬取皮於狐類而裘成
夏取毛於駝類而褐成也 天中記駱駝糞煙直上如

狼烟 東觀漢記單于於龍祠鬪橐駝爲樂 夷事略

回紇以駱駝耕 格物總論古者典厩駝日給藁一圍

鹽三合易馴養也 諧噓錄趙崇佯不識駱駝呼爲山

驢王 三水小牘劉秉仁爲江州刺史自京將橐駝至

郡放之山下野人見而大驚共射之乃以狀白州曰獲

廬山精於某處劉命致之乃所放駝耳 漢書大月氏

國出一封橐駝注脊上有一封封高也若封土然 北

史迷密國正平元年遣使獻一峰黑橐駝 明皇雜錄

哥舒翰常鎮於青海路既遙遠遣使常乘白駱駝以奏
事日馳五百里 唐食貨志貞元初關輔宿兵以飛龍
駝負永豐倉米給禁軍 孔六帖吐蕃贊普其獸獨峰
駝日行千里 南蠻傳室利佛逝國有橐駝豹文而犀
角以乘且耕名駝牛豹 酉陽雜俎駝臥屈足腹不著
地而漏明者最能行遠 天寶遺事楊貴妃私發明駝
使遺安祿山龍腦香明駝者眼下有毛夜明日行五百
里 洽聞記于闐國有小鹿角細而長與駝交生子曰

風脚駝日行七百里其疾如吹 南史滑國有兩脚駝
時而人立 拾遺記有韓房者自渠胥國來獻玉駝高
五丈 洛中記有銅駝二枚在宮之南四會道頭高九
尺頭似羊頸身似馬有肉鞍兩箇相對 異苑西域苟
夷國山上有石駝腹下出水以金鐵及手承取即便
對過唯葫蘆盛者則得飲之令人身體香淨其國神秘
不可數過

驢

何承天纂文驢一曰漢驪其子曰驂其鳴歔欷驢似馬而長耳低小不甚駿故稱蹇驢一名爲衛猶龜之名蔡也率以午及五更初而鳴 資暇錄代呼驢爲衛於文字未見今衛地出驢義在斯乎或說以其有鞅有槽譬如諸衛士有胄曹也自目爲衛 山堂肆考驢性能旋磨及馱負龐褐色其子一名驕 潛確類書驢馬駒月初生者先母行生月中者並母行生月終者後母行物類相感志凡驢狗初生來墮地口中有一物如肉名

媚如婦人帶之亦有媚 漢書靈帝於西園弄狗駕四
驢親操轡京師相效驢價與馬齊 柳宗元文黔之驢
一鳴虎大駭以爲且噬已稍近益狎蕩倚衝冒驢不勝
怒蹄之虎喜曰技止此耳斷其喉盡肉去 王元禎湖
海搜奇陝西民家畜一驢其壻借乘入市踰時往返百
里如飛壻心切愛之翁問歸何太早壻詭曰驢劣行十
里卽臥不肯起因牽之歸耳乃誤我一日翁憎其驢壻
去殺而烹之壻聞亟止曰我戲耳然驢已皮矣惋恨間

取其腹視腰有六腎蓋千里驢也翁怒絕其壻 下帷

短牒王粲好驢家畜數頭其價有至百金者其一曰落
釵其二曰遠遊其三曰驚翼其四曰白鳳其五曰臨江
其六曰上雲其七曰奔濤其八曰飛星 袁淑俳諧集
封驢爲廬山公 清異錄武宗十玩圖謂驢爲長耳公

廣博物志釋道安常乘赤驢往來荆襄間一日而徧
陳繼儒筆記洪崖跨白驢曰雪精今樹上至今有雪
精遺跡 虎苑國朝劉馬太監從西番得一黑驢進上

能一日千里又善鬪虎上取虎城牝虎與鬪一蹄而斃
又鬪牡虎三蹄而斃後取鬪獅獅折其脊劉大慟蓋龍
類也 洞冥記修彌國多神馬騾驢十丈毛色皎然能
行水上有兩翼或飛於海上常與牧馬合則生神驢

南史滑國出野驢有角 潛確類書海驢形似驢常於

秋月登島產乳皮制雨衣雨不能潤 海語海驢多出

東海狀如驢舶估有得其皮者毛長二寸許晴則毳毳
下垂陰則毳綵整整也或以製臥裯善人御之竟夕安

寢不善人枕籍魂乃數驚矣島夷詫其靈不敢蓄也

庶物異名疏閭山驢也周書北唐以閭亦見鄉射禮山海經有閭廩郭璞云閭卽羴也似驢而岐蹄角如麋羊一名山驢贊曰閭善躍嶮 酉陽雜俎晉僧朗住金榆山及卒所乘驢上山失之有人見者乃金驢矣樵者往往聽其鳴響土人言金驢一鳴天下太平 明皇雜錄張果常乘一白驢日行數萬里休則重疊之其厚如紙置於巾箱中乘則以水噀之還成驢矣

騾

古今注驢爲牡馬爲牝則生羸

同騾

玉篇駝駟驢父牛

母說文駝駟馬父驢母也

爾雅翼蜀中縣有馬與

牛合而生者皆牛爲牡馬爲牝故今川廣皆產騾生於
廣者蹄輕產於蜀者蹄重以大武之遺體也馬力在前
驢力在髀羸力在腰騎乘者隨其力而進退之羸股
有鎖骨故不能生其狀大骨若臼而口小小骨若杵而
頭大小口啣大頭故不可出此羸之所以不滋息焉

蟬史騾不生育性剛善走視馬則小視驢則大北方人多取以駕車力耐遠行而不困 潛確類書羸似驢健於馬舊非中國所產故漢書以爲匈奴奇畜 五雜俎羸之爲畜不見於三代至漢時始有之匈奴北地馬驢游牝自相交合而生今北方以爲常畜其價反倍於馬矣俗言羸骨無髓故不能交合生子 呂氏春秋趙簡子臣陽城渠胥有疾醫云得白騾肝則生不得則死簡子殺所愛白騾取肝與之 鄭榮傳信記上將登封泰

山益州進白騾至潔朗豐潤權奇偉異上遂親乘之柔
習安便不知登降之倦告成禮畢復乘而下纔下山坳
休息未久而有司言白騾無疾而殪上歎異之謚曰白
騾將軍命有司具椁積疊石爲墓在封禪壇北一里餘
於今存焉 舊唐書吳少誠據蔡州地既少馬而廣畜
騾乘之教戰謂之騾子軍尤稱勇悍而甲仗皆畫爲雷
公星文以爲厭勝 洞冥記修彌國獻駁騾高十尺毛
色赤斑皆有日月之象帝以金埏爲鑱絆以寶器盛芻

以飼之後變爲赤龍入雲去
揮麈錄徽宗御駁驛名
鵜鴿青

格致鏡原卷八十三